

# ***Babylonisch's Gebabbel***

## **Turmbau vun Babel**

(1. Mose 11, 1 – 9)

### **Predigt in Kurpfälzer Mundart**

von Pfarrer i.R. Oskar Ackermann, Brühl / Baden

Evangelische Kirche Brühl am 18. Oktober 2015

Liewe G'mei, ihr liewe Christeleit'!

Wer von eich hod ewe g'nau uffgebasst? Hod's ebber von eich g'merkt, dass selle G'schicht' vum Turmbau aa annersd heiße keend? Ich will eich uff d'Sprüng' helfe: Mit was is de Turm gebaut wore? He?! Mit Zieggel, mit ganz viel Zieggel! Und wu sin' frieher ganz viel Zieggel gebrannt wore? Wu? Nadierlich in Briel! Drum keend die G'schicht aa so heiße: Turmbau vun Briel. Gell, do glodzscht! Awwer Spass beiseit, unser G'schicht is e biblisch G'schicht un hod sich vor uralte Zeite abg'spielt; domols hod's Briel noch gar ned gewwe – un aa de Rohrhof.

De Turmbau vun Babel ist eene von de biblische Urg'schichte. Do were Sache verzählt, die so long her sin, dass mer nix g'naues ned weeß. Doch e Ahnung hod mer, wie's häd sei kenne. Mer will's in Worte, in G'schichte packe. Mer b'sinnt sich, hört do un dort was, hod göttliche Offe'barunge; macht Entdeckunge, stellt Frooge, wie mer se iwveroll in de Welt g'stellt hod.

Un weil des alles aa Frooge sin, die uns heitzutag umtreiwe, drum lese mer die biblisch Urg'schichte aa heit noch un dud driwwer nochdenke un predische: Die G'schicht' vum Turmbau vun Babel, - awwer aa vun Brühl, Rohrhof un Ketsch, von Berlin, Brüssel, Damaskus, New York un sunstwo.

Ich will se eich jetzerd verzähle.

Also als alles vor longer Zeit o'g'fange hod, do hawwe sich die paar Mensche, die wu's gewwe hod, gut mite'nanner verstanne. Es gab nur ä Sprooch. Alla gut. Die Familie sin immer größer g'worre. Jäger un Sammler ware se. Un so sin die eene un des annere do un dort hänge g'bliewe an annere Ort'.

Donn uff ä Mol säch(g)d sich so en Stamm: „Mir suche uns ganz neie Siedlungsplätz', wu mer besser lewe kenne. Alla, Leit', mir gehe Richtung Oste.“ Des war die erscht Völkerwanderung. Oder ware's scho die erschte Flüchtling'? Sie hawwe g'sucht, sin g'loffte, hawwe Entbehrunge' uff sich g'nomme, Hunger un Dorscht g'habt, bis'se was G'scheit's g'funne hawwe: e große Ebene, die Talebene im Land Schinar, des mer aa Zweistromland heiße dud. Die Menschheitsg'schicht hod so in de Biwel ihr'n erschte geographische Fixpunkt g'kriegt.

War des e Freud' for den Stamm, dass se sich do jetzerd hawwe wohl fühle kenne. Noch 'ner Weil' üwverlege' se sich: Wemmer schun do bleiwe welle, donn baue mir uns was, ebbes was gonz Großes. Do sage e paar kreative Köpp': Aus dem Lehm, den mir in de Flußebene g'funne hawwe, kann'mer was Neues mache – so was wie Stoiner: den Lehm in

kleene Stickle forme, brenne un schun hod'mer Zieggel, mit dene was gebaut were kann. Des is viel oifacher als Stoiner z'sammle oder aus de Felse z'breche. Un donn hawwe mer noch was entdeckt – Erdharz, Asphalt, des is besser als Mörtl. Was könne mer dodemit mache?

2

Sie hawwe ned long üwwerlege müsse: Mir baue uns jetzert Häuser, feschde Häuser, e große Stadt soll's were. Wohnraum for alle, ä Deheem, wu mer z'samme un sicher lewe kenne, sei Ruh' hod un g'schützt is. Alles werd g'regelt, alles soll sei Ordnung hawwe. Un wenn'mer scho dabei sin beim Baue, muss aa noch en große Turm her. Kee Wachtürmle, nee, en ganz große Turm, dem sei Spitz soll ganz hoch naus gehe – bis in de Himmel nuff. Alles soll'er üwwerrage. Mer sod aa noch viel später sage: die Bauleit', die des g'schafft hawwe, die hawwe ihr Sach' kenne, so was G'waltisches und Mächtisches; dene ihr'n Nome muss mer sich merke.

Un so hawwe o'gfange, mordsmäßig zu schaffe. Gonz klor, sage sie sich, mir kriege des hi(n), des ganz Große, - mir gonz ällöi.

Doch bei dene Allmachtsphantasiee is'ne ned in de Sinn kumme, dass do noch ebber sei keent', der wu mächtiger is als sie. Der im Hinnergrund de Herr is üwwer alle un alles, de Schöpfer un Vollender vun allem, was is, was war un was sei wird. Korzum: Gott.

„Der Herr im hohen Himmel wacht“ heißt's in dem Lied „Kein schöner Land“. Des stimmt. Drum säch(g)d sich de Herrgott: „Do unne bei de Mensche dud ebbes was schief laafe! Ich geh hordisch mol runner un do nochgugge, was die so treiwe.“ Un so macht'er uff de große Baustell en Vor-Ort-Termin, nadierlich inkognito. Schwätze will'er mit koi'm von dene forsche Bauleit' un coole Macher.

Gott guggt sich des alles g'nau o', macht sie sei Gedanke üwwer des, was die Mensche do treiwe un kummt zu dem Entschluss, dass des so ned weiter gehe kann. Un er lässt seine Gedanke glei' Tate folge. Er handelt in seiner ihm eigene Vollmacht un Allmacht. Er regiert un reagiert, bevor sich d'Mensche in ihre Allmachtsphantasiee selwer z'grund richte. Er will se vor sich selwer schütze. Die Mensche, dene er bei de Schöpfung so viel mitgewwe hod, so viele Fähigkeite, Kreatives un aa ebbes was Göttliches. Die Mensche awwer gehe dodemit ned gut um. Sie sin lieblose Egoiste g'wore. Gott sieht voraus: Des mit dem Turm un de Stadt, des is nur de Ofang. Wenn se sich immer eenig sin, wenn sich so viel Macht un Können bei ganz wennische konzentriere dud, sie d'Informatione nör for sich selwer speichere, alles an ä'm Ort – oh, oh, des muss schief gehe, do geht die gut' Ordnung verlore: Rücksicht, Toleranz un Liewe bleiwe uff de Streck. De Herrgott hod die Ahnung, dass'er mit de Mensche noch viel Zores hawwe werd, weil die uff de Erd unne liewer verrückt spiele als sich an des zu halte, war er ihne an Gutem o'gebote hod. Welle ihn gar abserviere?

Es war koi Dunderwetter, mit dem er dezwische fährt. Un es is koi Blut g'flosse. Er dud oifach ihr' Sprooch' dorchennanner wirble. Jedes babbelt uff ä Mol ganz annersd.

Mir kenne uns des so vorstelle: Als se am Morje wieder an ihr Ärwet gehe, entsteht uff de Großbaustell' e groß' Kuddelmuddel.

> Nu gugg ä Mol! Die krieschen geen rischdisches Wort raus!

> Pfui Deifi! Was moinschd? Kriegschd glei a Waotsch'n!

> He, horsch ä Mol, wenn du mit dei'm blöd' Gebabbel ned uffhöre duschd, falle glei fünf Zieggel uff dein Qadratschädel!

> Na wat'en, wat'en! Mensch Meester, ick vasteh nur Bahnhof!

> Jo nai, so öbbis, mir chönne die Lüt' gar nümme verstoh!

3

> So'n Schittkrams, de sin oll duun.

> Mir kehret uns en Dreck drum, was die so saudomm deherschwätzet. Mir machet dapfer weiter: Schaffe, schaffe, Türmle baue.

Oh babbel-mer-doch-keen-schwätz-mer-ned! Do gibt's aa for d'Schwobe nix mehr zu schaffe. Des Kuddelmuddel ist zu groß. Werkzeug un Zieggel, Stange un Küwwel liege kreuz un quer rum. Alle Leit' ziehe frustriert fort, jedes wu annersd no. Zurückbleiwe die halwe Häuser un vor allem der o'g'fangene große Turm.

Mer hod später soddische Tempeltürm' g'funne z'samme mit große Paläst' – un zwar in de Stadt Babel, die noch später Babylon heiße dud. So is die ganz alte G'schicht zu ihr'm Nome kumme: Turmbau vun Babel.

Warum, ihr liewe Leit', warum hod de Herrgott so ebbes g'macht: die Sprooche dorchanner gebrocht un d'Mensche in viele Länder g'schickt? War's e Strof? Ha, eender ned. Er hod se vor sich selwer schütze welle, damit all die lieblose Egoiste un brutale Macher ned die g'wöhnliche Leit drangsaliere. Un er will respektiert were. Drum hod'er e Stopp-Schild, a was nä, er hod e Gebots-Tafel, ein Wegweiser uffgestellt, uff dem e änzisches Wort druff stehe dud: Liewe.

Seller Wegweiser will sage: Leit, es geht so ned weiter, ihr müsst annere, neue un getrennte Wege gehe un in viele Länder lewe, damit ihr donn durch den Geist der Liewe neu zuenanner finne könnt. Ihr sod so lerne un merke, wer ihr selwer seid: Eure eigene Sprooch un Mundart spreche; eurer eigene Kraft un Stärke vertraue; awwer aa sehe un merke, dass die in de annere Länder mit ihre annere Sprooche ned nur fremd sin, sondern aa ihr Gutes un ihre Stärke hawwe, dass mer von dene was lerne un üwwernemme kann un dodurch bereichert wird.

Im Geist der Liewe neu zuenanner finne – üwwer die Grenze vun Länder un Sprooche.

Hinner dem Wegweiser Liewe steht selles Gebot oder de Wunsch von Gott: Im Alte Testament steht's uff hebräisch, im Neue Testament steht's uff griechisch un in dene viele Biwwelübersetzunge steht's in hunderte von Sprooche: Du sollschd Gott de Herr liewe, du sollschd dein Nächste liewe wie dich selwer.

Oh, däde mir Mensche uns doch mehr an des oifache Gebot, den klore Wegweiser halte – in alle Religionen, in alle Länder uff dere Welt! Doch es gibt leider z'viel' große Baustelle, uff dene lieblose Egoiste un brutale Macher s'Sage hawwe – wie domols in Babel.

Warum g'rad Liewe? Sie will uns was lehre un bei'bringe. Ebbes, was Egoiste un Macher so ned kenne.

Liewe is wie e Samekorn, des in d'Erd' falle un uffkeime dud un zu em große Baum wächst; viel Frücht' trage dud, die wieder viel Samekörner hervorbringe. Liewe is drum ebbes, was ganz kloie sei kann un doch wieder ganz groß un vielfältig.

Monchmol muss mer d'Liewe wie e Geheimnis for sich b'halte, d'Gosch' halte un still sei. Donn awwer muss se neugierig sei, derf schreie, Neues entdecke, Erfindunge mache; staune un bewunnere, was annere mache. Sie muss uff annere zugehe, Respekt un Toleranz zeige; Grenze üwwerwinne, awwer aa ei'halte. Sie muss was dulde kenne, awwer aa Flagge zeige, sich eii'mische, sich ei'setze for Friede un Freiheit, gege Krieg, G'walt un Hass sei; Not sehe

4

un helfe; G'setz un Ordnunge ei'halte, sie awwer aa weiter entwickle. Un sie derf aa mol e Aug' zudrücke, die Liewe. Korz: Vielfalt lewe un dodevor kä Ängschd hawwe, sondern des alles als Bereicherung un als ständische Entwicklung o'nemme un erlewe– im Geist vun de Liewe Gottes.

Die Liewe will wie en vielstimmische Chor sei, in dem aa soddische mitsinge derfe, die eigentlich kee schee Stimm' hawwe.

Damit die Mensche des lerne, hod de Herrgott domols in Babel des Kuddelmuddel mit dene viele Sprooche g'schaffe. Un er hod den Wegweiser hi(n)g'stellt mit dem Ufftrag: Leit', lernt un merkt, wer ihr selwer seid; dud g'nau uffenanner horche un ned anenanner vorbeiredede. Dud versuche, die annere in Liewe zu verstehe; wenn's sei muss, geht's jo aa irgendwie ohne Dolmetscher – mit de Händ' un Fieß'.

Des hod Herrgott welle, als er uff de Baustell von Babel sein Wegweiser Liewe uffgestellt hod.

Ich verrot eich koi G'heimnis, wenn ich sag, dass er immer noch debei is, uff unendlich viele Baustelle soddische Wegweiser zu verteile, er kummt gar ned noch. Hawwe mir acht druff, wie de Herrgott sich so melde un ei'schalte dud in unser Lewe?

In kloinere Baustelle wie bei uns in Briel, Rohrhof un Ketsch, wu's oft an de nötige Liewe, an Rücksicht un gegeseitische Verständnis fehlt. Oder an de ganz große Baustelle, do, wu die große politische Entscheidung falle – wie in Berlin oder bei EU in Brüssel oder bei de UNO in New York. Un an selle große Baustelle, wu brutale Kriege un Machtkämpfe ausgetrage were – wie z.B. in Afghanistan, in Syrien, im Nahe Oste, in Afrika, vun wo die Mensche in Masse als Flüchtling zu uns nach Europa, nach Deutschland kumme.

Wie nemme mer se uff? Im Geist der Liewe? In dem Geist vun seller Liewe, die Grenze un Sprooche üwwerwinne kann? Die teile un Toleranz un Verständnis uffbringe kann?

Domols in Babel uff de Baustell hod de Herrgott inkognito nochgeguggt, was die Mensche so treuwe. Wenn er heit z.B. bei uns in Briel, Rohrhof un Ketsch nochgugge däd, was mir so treuwe un mache im Wissen um die viele Baustelle? Ha, es wär doch schee, wenn er dodebei merke däd, dass die Leit dort – also mir – versuche, dem Wegweiser Liewe so gut wie möglich zu folge un dodebei kurpfälzisch wie hochdeutsch un ausländisch babble wie aa die babylonische Vielfalt vun dene Menschen, die als Fremme zu uns komme, verstehe un o'nemme.

Ubi caritas et amor, deus ibi est. Wo d'Liewe wohnt un Güte, do is unser Gott.

Ame(n).

